



Komunikadu Imprensa

24 Janeiru 2019

Parlamentu Nasionál

Plenaria Parlamentu Nasionál realiza ho lian Portugés: Deputadu sira la sériu

Iha Tersa-feira 22 Janeiru 2019, Parlamentu Nasionál (PN) hala'ó reuniaun plenaria ho dalen Portugés. Reuniaun plenaria ho dalen Portugés ne'e prevee ona iha Rezolusaun Parlamentu Nú. 24/2010 pontu 8 katak Parlamentu Nasionál sei uza dalen Portugés iha reuniaun plenaria dala ida kada fulan.

Iha reuniaun plenaria ne'e, JSMP nota katak deputadu sira barak mak hamanasa no halo barullu hodi hakilar ba Prezidente Meja iha ezersísiu, distintu deputadu Luís Roberto, hodi haruka nia para ko'alia tanba nia iha limitasaun hodi espresa iha dalen Portugés. Situasaun ne'e hatudu imajen plenaria Parlamentu Nasionál hanesan tiha fatin halimar nian. Aleinde ne'e, deputadu sira la'ó tama no sai durante plenária hanesan laiha respeito ba uma Parlamentu ne'e rasik.

“Parlamentu Nasionál nu'udar órgaun soberanu ida no deputadu sira nu'udar representante povu, tuir loloos sira tenke ezerse sira nia knaar ho responsabilidade atu hatudu dignidade no autoridade nomós ezemplu ne'ebé di'ak bainhira hala'ó sira-nia knaar, liu-liu iha plenaria”, dehan Diretór Ezekutivu JSMP, Luis de Oliveira Sampaio.

Durante plenária distinta deputada Olinda Guterres hateten katak devia hasai tiha regra iha rezolusaun parlamentár ne'ebé dehan uza lian portugés iha plenária.

Tuir JSMP nian hanoin, mesmu lian Portugés kontinua sai dezafiu iha maioria instituisaun públiku no sosiedade sivíl sira maibé nu'udar deputadu loloos deputadu no representante povu deputadu sira tenke iha seriedade hodi implementa no respeita ita-nia Konstituisaun no regra sira ne'ebé deputadu sira mak aprova iha PN.

Iha lejislatura datoluk, JSMP rejista preukopasaun hanesan relasiona ho utilizasaun lian Portugés iha plenaria ne'ebé rejulta plenaria la funsiona ho efikaz no la produtivu tanba deputadu barak la kontribui iha diskusaun no intevensaun sira.

JSMP fiar katak utilizaun lian portugés dala rua iha kada fulan iha plenária hanesan maneira ida atu promove no implementa iha prátika utilizaun ba lian ne'e rasik, maibé JSMP husu atu tenke asegura katak prátika ida-ne'e la hamenus produtividade no efikasia funsionamentu Parlamentu Nasionál nu'udar orgaun soberanu ida. Partikularmente iha situasaun atuál ne'ebé eziye deputadu sira ninia konsentrasaun no seriedade hodi ultrapasa impase polítiku ne'ebé agora dadaun Estadu Timor-Leste atravesa hela.

Ba informasaun kompletu, favour kontaktu:

Luis de Oliveira Sampaio
Diretór Ezekutivu JSMP
Telefone: 3323883
www.jsmp.tl